

ARUWEN LEGISLATURE--UN EWE MUUN CHUUK

AUNUNGATIN MWIICHENAP, MAY 7, 1984

NAMOPUNG NO. 2-116.

EW NAMOPUNG

A forata ew Economic Development Authority fan asengesin ewe kinikin itan Lukeisel, ren fan iten angangen afefeitian tufich, a pwan fori atootun, tumunun wisan me an angang, awora an nemenem, me pwan ren ekkoch popun.

Epwe pung me ren ewe Legislature-un Chuuk.

Tetten 1. Forutaan ewe Authority. Ewe Lukeisel Economic Development Authority iei a foruta fan pochokunan annukun Truk State me Federated States of Micronesia. Ewe Board non ewe Authority epwe wisen finata nenien ewe Ofesin Authority.

Tetten 2. Neni Mei Nomw Fan Pochokunan ei Authority. Ei Authority a foruta ren an epwe atufichi ekkei municipalities non Chuuk, iei a mak iter fan:

- (1) Nama;
- (2) Losap; me
- (3) Pis-Losap

Tetten 3. Popun Forutan Authority. Ei Authority epwe wisen nenne-nengi ekkewe osupwang an ekkewe neeni, iwe seni an pusing tongeni, epwe angang fongon me ewe Muun Chuuk me Muun Federated States of Micronesia me pwan ekkewe pekin angangen pisinis an aramas ne effefeitai pekin angangen moni non ekkei neeni an ei Authority.

Tetten 4. Board of Directors.

(1) Forutan. Epwe wor ew Board of Directors non ewe Lukeisel Economic Development Authority, epwe wisen tumunu pwan nemeni ewe Authority;

(2) Choon. Epwe ukukun tiwemon chon ewe Board, ruomon me neir epwe finita me ren ekkewe samon non ekkewe municipalities mei affat non Tetten 2, fiti kapungunoon me ren ewe municipal council non ew me ew ekkewe municipalities; emon state senator seni ewe kinikin; ewe national senator a tupuni ewe kinikin non ewe FSM Congress; me ewe tupun Kepina non ewe kinikin, ir repwe ex-officio members, esap wor ar right ne fout.

(3) Nangataman Fansoun Wiis. Nangataman fansoun wiis ren ekkewe re tupuni ekkewe municipalities epwe unungat ier,

chinoon chok ren nepoputan ar wiis me ammasowen wiis mei ponuno epwe fiti met mei affat me non ei Annuk. Ekkewe. state me national senators repwe chok wiis fansoun ar wiseni wiser kewe . Ekkewe tupun minicipal, ar poputan fansoun wiis epwe non ewe ran ra efisi ar aewin mwiich;

(4) Aewin Mwiich ren kotun nouwiis. Esap mang seni one (60) ran me murin ewe ran a poputa pochokunan ei annuk, ewe Board epwe efisi an mwiich ren an epwe finata noun nouwiis, pwan fori ekkoch an angang. Poputan ewe aewin mwiichen ewe Board epwe akko me ren ewe State Senator, ewe a tupuni ewe kinikin, ika ese nomw epwe ewe tupun Kepina, i epwe wisen nemeni ewe mwiich tori an a finata ekkewe nouwiis mei affat me non Kinikinin-Tetten (7) me non ei Tetten;

(5) Neni mei Poon. Ew neni mei poon me non ewe Board epwe ammasou usun chok pwan napanapen an finata me mwan. Nupwen fansoun a wor ew neeni mei poon, iwe ewe Chairman, nge ika ese nomw iwe epwe ewe a wisen nemeni ewe mwiichen Board, epwe asinengeni chon ewe Board me ewe municipal government a wisen finata ewe neeni a poonuno;

(6) Toou.

(a) Choon ewe Board repwe tongeni tou seni ewe Board nupwen fansoun ar rese tongeni fiti mwiichen ewe Board fan unungat tettenino chok, iwe ese pwan excuse, ika seni ar rese tufich non wiser, rese fori angangen wiser ika ren fofforungaw non ar wiis;

(b) Ren an emon choon ewe Board epwe tongeni tou seni wisan, epwe ukukun unungat-naruwanuwen (3/4) choon ewe Board meinisin repwe tongeni tipeew ngeni non ar fout. Iwe porausen usun an emon epwe tou seni wisan, epwe akkomw for, esap kis seni iniik ran me mwan ar repwe angang won, non napanap epwe affat non an ewe Authority by-laws, epwe pwan affata non menapen poraus met

ewe popun ika sakkun tipis a ku ewe emon chon
ewe Board, pwan affaten iokewe chon pwarata
me met pisekin pwarata epwe kawor ren ewe katou;
pwan

(c) Ewe State Court non Chuuk epwe
wisen nomw ren ewe pochokun an epwe eani ewe
kapungun atomwaniewu monun ewe Board nupwen epwe
wor claim ngeni ewe court won ewe napanap ese pung
an ewe Board decision won ren ewe katou.

(7) Nouwiis. Ewe Board epwe finata seni chon ewe
Board, emon Chairman, emon Vice-Chairman me emon Secretary-
Treasurer. Ewe Chairman epwe wisen nemeni mwiichen ewe Board
nupwen fansoun mwiich. Nupwen an ewe Chairman ese nomw, ewe
Vice-Chairman epwe wisen nemeni. Nge ika ir me ruomon rese
nomw, ewe Secretary-Treasurer epwe wisen nemeni. Annukun ei
Authority (By-laws) epwe affata io epwe wisen nemenem nupwen
ekkei nouwiis rese nomw.

(8) Fansoun Mwiich & Mwiich Atapwanapwan. Mwiich
epwe fis esap kis seni fan ew non iteiten kuachen(quarter)
ier, fansoun me nenian mwiich epwe finata seni ewe Chiarman
usun epwe affat non ewe by-laws an ewe Authority. Mwiich
Atapwanapwan mei tongeni fis me ren chok ewe Chairman, ika
pwan seni monun ewe Board, nupwen a wor ukukun ew-na-ununga-
tin (1/3) chon mwiich ra tungor, ren napanapan ei sakkun
epwe pusin affat non by-laws an ewe Authority;

(9) Ukukun Chon Mwiich (Quorum). Epwe ukukun
nimmon (5) choon mwiich mei nomw iwe a tongeni efisi mwiiche-
nap me mwiich atapwanapwanen ewe Board ren an epwe tongeni
fori angangen wisan fongon me tupun ekkewe municipalities
meinisin repwe nomw non ewe ukukun nimmon

(10) Executive Committee. Ewe Board mei tongeni, fan
pungun an by-laws, forata ew an Executive Committee, finata
ukukun choon me pwan fori me awora sakkun an angang me wisan;
me

(11) Taropwen Mwiich. Meinisin an ewe Board me ewe
Executive Committee mwiich epwe suuk ngeni aramas, nukun chok

ika pwe mei wor mettoch mei mwonomwon ren porausen emon
chon ewe Board ika ewe Authority mei wor angang won. Ewe
Secretary-Treasurer ika nupwen ese nomw, emon chon mwiich
epwe finita seni by-laws epwe wisen tumunu unusan porausen
ewe mwiich fansoun mwiich, iwe epwe mumuta an aramas repwe
katon non ese nifinifin fansoun me neeni, usun met by-laws
a affata, chinoon chok mettoch mei mwonomwon ren porausen
emon chon ewe Board ika ewe Authority.

Tetten 5. Pochokunan ewe Authority. Ewe Authority, non mwokutuku-
tun ewe Board of Directors, epwe ikkei an pochokun, wisan me an angang:

(1) Kutta me nengeni ekkewe osupwang ren pekin moni
tonong, sukun me napanapen ach nonomw non ekkewe neeni ei
pekin angang a wisen tumunu me angang ngeni, fongon me met
ekkeve neni eoruni me nonomwuur;

(2) awora atoot ren met epwe fis ren afefeitan
pisekin manawan me tufichin ewe neeni;

(3) kut moni seni ekkoch pekin ren an epwe atufichi
ei angang ika atoot;

(4) fori ekkewe program me projects fan pungun
met an atoot seni pusin chon angangen ei Authority ika fan
pungun contract, menni chok sakkun ei Board a mefi pwe mei
murino;

(5) awora emon Executive Director me Finance Officer;
pwan fori annukun ekkewe chon angang pwan awora ekkoch angang
seni meta annuk a apasa, ika seni an ewe Board mefi pwe mei
aucha ren afefeitan me mwokutun popunapen ei Authority;

(6) a tongeni fiti pungun annuk an epwe kuta ika angel
fonu, pisek, pwan aea, imweimw, pippisek ika pwan tongeni amomo,
ika mutata an epwe chok kamo nupwen aea, ika aniwini pisekin
kewe nupwen fansoun ewe Board a mefi pwe mei murino ngeni an
angang;

(7) epwe forata, tumunu me amwokutu ika fori fan pusin
an mwokut met sakkun angangen pekin moni ika enterprise ika mwo-
kutukut mei auchea me namot ngeni efefeitan popunapen ewe
Authority, epwe pwan ioni niwinin me monien ekkewe angang, iwe
ekkeve moni epwe katonong non ewe Monienapen ewe Authority;

(8) fori me efisi met contract, ika pwan met sakkun etipeew ren pekin angang mei namot ngeni ewe angang, me. pwan ekkoch napanap mei mefi pwe mei murino ngeni popunapen ewe angang;

(9) epwe tongeni paro moni non ekkoch fansoun nge an ewe Authority kewe niwinimang esap pwan an ewe Muun Chuuk ika kinikinin kewe, pwan an kewe pisek esap pwan tongeni aea ren kamusen an ewe Authority niwinimang, chinoon chok ika mei affat me non Annuk;

(10) awora pwan angei niwinimang, fees me pwan non pisek mei kamono me non angangen ewe Authority a fori nge esap wor moni tonong seni ei angang epwe napanapen ew takises epwe ku ika weneiti aramas ika an pisek, ika takisesin aean an kewe pisekin muun ika seni ekkewe pisek an ewe Authority; nukun chok ika pwe mei mumuta seni annuk;

(11) fori pwan ekkoch mwokutukut, fiti pungun annukun ewe angang, ika an by-laws, ekkewe taropwe me met mei auchea ika namot ngeni popun ewe Authority;

(12) fori ekkewe ekkoch angang me eani ekkewe sekining mei namot ika murino ren apwoueta an kewe angang me wisan mei affat me ren by-laws; me

(13) apungano by-laws, policies me procedures ren emwenin me mwokutukutun ewe Authority.

Tetten 6. Kapung me Tupun non Kapung.

(1) Ewe Authority a tongeni kapung ngeni emon non pusin itan, me fen pwan tongeni tur non kapung: nge mettoch ika niwinimang an ewe Authority nupwen an fori eoch anangang esap an ewe Muun Chuuk angang, esap ew an ewe Muun Chuuk niwinimang pwe pusin an ewe Authority; me

(2) Ewe Attorney General non Chuuk epwe wisen tupuni pwan anisi ewe Authority non pekin mettoch mei fiti annuk, chinoon chok ren met mei wor an conflict of interest won, ika met mei wenengeni.

Tetten 7. Nemenem.

(1) Ewe Authority, fan mwokutun an ewe Board, epwe anomu, tumunu me atou moni ika pisek mei kawor ngeni ewe

Authority seni ekkoch pekin angang. Ewe Authority mei tongeni aea napanapen an muun tumun ren pekin taropwen moni, ika pwan ekkoch sakkun napanapen tumunun moni me taropwen moni mei foruta seni annuk ren pekin angangen company; me

(2) Ewe Authority mei tongeni kamo an pisekin non ofes, pisekin angang me ekkoch sakkun pisek non an pusin napanapen kamo ika an muun napanapen kamo ika menni chok napanap epwe tufich.

Tetten 8. Budget-in Ier. Ewe Board epwe fori pwan atononga an ewe Authority Budgetin iteiten fiscal ier, non met napanap mei affat me non annuk, usun mei fis ren ekkewe putaen ewe Muun Chuuk nupwen ar fori pwan atononga ar budget. Ese mumuta an epwe katou me nounou moni mei watte seni met ukukun mei kawor ngeni, iwe tipisina ena sakkun epwe usun chok met napanap mei fis ngeni Muun Chuuk.

Tetten 9. Executive Director. Epwe wor emon Executive Director non ewe Authority, epwe finita seni ewe Board, pwan nomw non an we wiis fan mochenin chok ewe Board. Ewe Board epwe wisen fori niwinin ewe Executive Director. Ewe Executive Director epwe wisen tumunu angangen ekkewe programs me projects me pwan met angangen ewe Authority, iwe epwe pwan tongeni atononga, nemeni me atou chon angangen ewe Authority, fiti pungun me ren annukun chon angangen ewe Board epwe forata, nukun chok meta a apasa non Tetten 10.

Tetten 10. Finance Officer. Ewe Executive Director epwe wisen finata emon Finance Officer, fiti tipeewin ewe Board iwe ren napanapen ewe wiis epwe affat non an by-laws. Ewe Finance Officer epwe wisen angei pwan atou monien ewe Authority. Ewe Finance Officer epwe fori wisan fan nemenian ewe Executive Director.

Tetten 11. Taropwen Moni. Ewe Board me ewe Executive Director repwe responsible ne nengeni pwe ewe Finance Officer mei tumunufichi taropwen me puken moni, epwe pwarata moni tonong, moni tou, pisekin me noun moni, me an ewe Authority niwinimang, pachenong pwan met an pisek me noun moni. Ewe Board epwe fori an repot ngeni ewe Governor non Chuuk me ewe Speaker non Legislature, esap mang seni one (60) ran me murin an sopono ewe fiscal year, non an iwe repot epwe affata meta ewe Authority a fori non ewe ier, ifa usun nonnomwun non ei ier, pwan met kaan ewe Board a mefi pwe mei murino an epwe repot-ini. Ewe State Auditor nge ika ese wor emon, iwe ewe emon mei wor noun

naisen ren pekin chekin taropwen pisinis, epwe finita seni ewe Board, ren an epwe wisen cheki ika nengeni taropwen ewe Authority iteiten ier, iwe epwe repotuni met a kuna ngeni ewe Governor me Speaker non ewe Legislature.

Tetten 12. An ewe Authority Takises. Fan aukukun ewe nemenem ren for takises, ewe Pekin Fori Annuk non Chuuk a tongeni fori pwe ewe Authority epwe pwan nomw non tettenin ew ekkewe pekin angangen muun; ren an epwe kepichino seni takises, usun chok ew ekkewe pekin angangen muun, ren an angang a pwan usun chok ew angangen muun. An ewe Authority angang a usun chok ew angangen sopai ika pisinis, nge'ewe Authority epwe iteni pwe ew angangen sopai esap fan iten profit.

Tetten 13. Annukun Choon Angang.

(1) Ewe Authority epwe pusin forata an annukun me napanapen tumunun' noun chon angang, esap pwan fiti ewe Annukun Choon Angang non Chuuk, ika ewe Truk State Public Service System. Ewe Board mei tongeni fori an tungor ngeni ewe Governor, ren an epwe pwan pachenong non ewe Truk State Public Service System fan asengesin noun chon angang; nge, ika pwe ewe Authority a mochen pwe epwe pachenong non ewe Truk State Public Service System, iwe ewe Board mei tongeni pwan finata ekkoch sakkun wiis a mefi pwe repwe kapichino seni ewe annuk;

(2) Meininis chon angangen ewe Authority pwan pachenong ewe Executive Director me ewe Finance Officer, ika pwe ir mei piin choon ewe Public Service System me mwan ar angang ngeni ewe Authority, ra tongeni chok sopweno ar kewe tufich me pung nupwen ar angang ngeni ewe Authority;

(3) Ewe Board, mei tongeni ngeni noun ekkewe chon angang tettenin niwin repwe niwinini me ekkewe sakkun tufich repwe eani non ekkoch kinikin ika non unusen, seni ar mei piin angang ngeni pekin muun me noomw; me

(4) Ewe Truk State Government epwe awora ngeni meininis ekkewe chon angang ngeni ewe Authority me noomw, ekkewe ra touu seni ar angang non iteoch ekkewe tufichin angang seni ar piin angang ngeni ewe Authority me ar piin angang ngeni muun, usun chok ekkewe tufich repwe angei nupwen ar angang ngeni ewe Truk State Government me ewe Trust Territory Government.

Tetten 14. Asinei ngeni ekkewe Municipal usun ekkewe Projects. Ewe Authority epwe achocho ne asinei ngeni ekkewe municipal government ika muun fonu ekkewe projects epwe nõ-ngenir non fansoun mei tufich, iwe epwe pwan sopweno ne akkasieni ngeni unusen aramas met porausen ekkewe projects ika mei akkasiwin non ar atoot.

Tetten 15. Kuten Fonu me Aninisin Kuten Neeni.

(1) Nupwen fansoun ewe Authority a mochen an epwe aea fonuwen ika pisekin emon aramas, iwe epwe chok fiti met mei affat me non Sopun 9 me 10, Itenap 67 me non ewe Trust Territory Code. Ewe State Government epwe wisen eani sekining ne kut fonu me kut neeni;

(3) Ewe Authority epwe muttir asine ngeni ewe State Government fansoun a mochen aea ika angei fonuwen ika pisekin emon aramas ika pwan fonuwen ika pisekin ewe Muun Chuuk, ika ewe Public Land Authority, ika mei wor. Epwe affat non ewe taropwen esinesin menni fonu ika pisek epwe aea ika angei, popun an epwe aea, nangataman fansoun aea, napanapen ekkesiwinin ika pwe ese fis ewe tungoren aea fofonu, me pwinin maram epwe poputa aean ewe neeni ika pisek. Ewe State Government epwe wor an puung non fonuwen aramas ewe Authority a angei ika aea, nukun chok ika pwe mei wesewesen affat me non Annuk.

Tetten 16. Kaworen Moni. Iei a kawor ukukun \$25,000, ika fite epwe tongeni naaf seni ewe Monienapen ewe Muun Chuuk, ren fan asengessin ewe Lukeisel Economic Development Authority. Ei moni mei kawor epwe nomw fan tumunuwen me no-ngeni ewe Board of Directors non ewe Authority, ewe epwe wisen sekining me nochei fan asengessin ewe Legislature an ewe moni epwe chok nounou ngeni met mei affat non ei annuk, me epwe pwan fiti pungun ewe Financial Management Act, iwe esap pwan wor katoun me nounoun ei moni epwe nap seni ei ukukun mei kawor. Met nussun moni mei wor nesoponon September 30, 1985, epwe niwinsefaan ngeni ewe Monienapen ewe Muun Chuuk.

Tetten 17. Report. Ewe Board epwe awora ngeni ewe Legislature me mwan April 15, iteiten ier repotun ewe moni, epwe affatatiw:

(1) unusen porausen nounoun ewe moni, fongon me nussun mei wor non April 1, iteiten ier;


(2) awora anapanapan nounoun ewe nussun moni mei wor non April 1, iteiten ier, an epwe nounou non ewe nussun- fiscal ier, nge och sotosopun repot epwe pwan kawor ngeni ewe Legislature, ika ew committee mei weneti, nefinen 20 raan me murin soponon ewe fiscal year, epwe affatatiw porausen nounoun ewe moni; pwan

(3) met anapanapan moni epwe pwan kawor ren ewe Lukeisel Economic Development Authority non ewe fiscal year epwe tapweto murin.

Tetten 18. Poputan Pochokunan.

(1) Tetten 16 me non ei annuk epwe poputa pochokunan non October 1, 1984, ika pwe a kapunguno me ren ewe Kepina, ika pusin an winiti annuk won winikapan.

(2) Ei Namopung epwe poputa pochokunan fansoun a kapunguno me ren ewe Kepina ika fansoun an a pusin winiti annuk won pusin winikapan.

Sain seni: 
Simeon Innocenti, Speaker
Truk State Legislature

Annetata seni: 
Datasi Albert
Chief Clerk
Truk State Legislature

Pwinin maram: Jan 31, 1985

Kapunguno seni: _____
Erhart Aten
Governor, Truk State

Pwinin maram: _____